


**UBUTUMWA BUGENEWE UMUNSI
MPUZAMAHANGA
W'YOGEZABUTUMWA RY'ABANA**

**« Bana, nimwitegure guhimbaza Yubile
y'Ubusaserdoti mu Rwanda.»**



Ku wa 19 Gashyantare 2017

**UBUTUMWA BUGENEWE UMUNSI
MPUZAMAHANGA W'IYOGEZABUTUMWA
RY'ABANA**

**« Bana, nimwitegure guhimbaza Yubile
y'Ubusaserdoti mu Rwanda.»**

Ku wa 19 Gashyantare 2017

Intangiriro

1. **B**ana dukunda, kuri iki cyumweru cya gatatu cya Gashyantare 2017, muri Kiliziya Gatolika yo mu Rwanda turizihiza Umunsi Mpuzamahanga wahariwe kuzirikana uruhare rw'abana mu Iyogezabutumwa. Ubutumwa twabageneye bufite insanganyamatsiko igira iti: **« Bana, nimwitegure guhimbaza Yubile y'Ubusaserdoti mu Rwanda ».**

Uyu mwaka Kiliziya Gatorika yo mu Rwanda irahimbaza Yubile y' imyaka ijana abapadiri ba mbere b'abanyarwanda bahawe Isakaramentu ry'Ubusaserdoti. Abo basaserdoti ni **Padiri GAFUKU Balthasazar** na **Padiri REBERAHO Donat** bahawe Isakaramentu mu rwego rw'Ubupadiri ku itariki ya **7 Ukwakira 1917**, naho **BUGONDO Joseph** akarihabwa mu rwego rw'Ubudiyakoni .

Icyo ni igitangaza gikomeye Imana yakoreye abanyarwanda, kuko babonye abapadiri kavukire nyuma y’imyaka cumi n’irindwi gusa, abapadiri b’abamisiyoneri batangiye kwamamaza Ivanjili mu Rwanda. U Rwanda ruri mu bihugu bike ku isi byagize ayo mahirwe yo kubona abapadiri kavukire nyuma y’imyaka mike Ivanjiri itangiye kwamamazwa. Yubile itubere umwanya wo gushimira Imana no gushimira abitanze ngo bishoboke.

2. **B**ana bacu, mu ibaruwa ya gishumba Abepisikopi Gatorika bo mu Rwanda banditse bashishikariza abakristu kwitegura guhimbaza iyi Yubile, hari icyo basaba buri wese (Reba Ibaruwa y’abepisikopi Gatorika bo mu Rwanda yerekeye Yubile y’imyaka ijana y’ubusaserdoti mu Rwanda yo ku wa 8 Nzeri 2016).
Ni muri urwo rwego ubutumwa twabageneye busobanura ubutumwa bw’umusaserdoti muri Kiliziya ndetse tukanabashishikariza kugira uruhare rugaragara mu guhimbaza iyi Yubile. Tubibutse ko iyi Yubile yatangiye ku itariki ya 7 Ukwakira 2016 i Kibeho ikazasozwa tariki ya 7 ukwakira 2017 i Kabgayi.

A. UBUTUMWA BW'UMUSASERDOTI MURI KILIZIYA

3. **B**ana dukunda, Ubusaserdoti ni Isakaramentu Yezu yaremye ku wa Kane Mutagatifu araye ari budupfire. Isakaramentu ry'Ubusaseridoti n'iry'Ukarisitiya Yezu yabiremye ari indatana ku muni umwe no ku isaha imwe. Yezu yaremye Ubusaseridoti muri aya magambo: Ibi mujye mubikora namwe bibe urwibutso rwanjye . (reba Lk 22,19). Mu Isakaramentu ry'Ubusaserdoti, urihawe ahabwa ububasha bwo gukora ibyo Yezu Kristu yakoze : kurema Ukarisitiya no kuyigaburira abana b'Imana; kuba umugaragu w'abandi, kubakunda no kubitangira; kuvuga no gukora nka Yezu Kristu, We Musaserdoti mukuru (reba Heb 8,1-2).
4. **B**ana bacu, Isakaramentu ry'Ubusaserdoti ririmo inzego eshatu: Ubwepiskopi, Ubupadiri n'Ubudiyakoni. Abepiskopi ni abazungura b'intumwa. Abapadiri ni abafasha b'imenya b'Abepiskopi. Abadiyakoni ni abafasha b'Umwepiskopi n'Abasaserdoti mu kwigisha Ijambo ry'Imana, mu kuyobora imihango

mitagatifu no mu mirimo y'urukundo rwa kivandimwe (reba Gatigisimu, Éd. Mutarama 1991, urup.78-79). Muri Kiliziya Umusaserdoti afite ubutumwa bwo kwigisha Ivanjili; gutagatifuza imbaga y'Imana akoresheje amasakaramentu no kuyobora umuryango w'abana b'Imana. Bityo Imana igasingizwa, n'abantu bakitagatifuza (reba Gatigisimu, Éd. Mutarama 1991, urup. 79).

5. **B**ana dukunda, kubera ko Isakramentu ry'Ubusaserdoti n'iry'Ukarisitiya byaremewe rimwe ku wa Kane Mutagatifu, inshuti ya mbere y'umusaserdoti ni Yezu uri mu Ukarisitiya Ntagatifu. Yezu akunda abana bose. Namwe bana nimukunde Abasaserdoti banyu mubabonemo Yezu. Babyeyi namwe kandi nimufashe abana banyu kwegera no gukunda abasaserdoti Imana yabahaye kuko Yezu yavuze ati « Nimureke abana bansange, mwibabuza kunyegera, kuko Ingoma y'ijuru ari iy'abameze nka bo » (Mt 19,14).

B. URUHARE RW'ABANA MURI IYI YUBILE

6. **B**ana bacu, nk'uko Bibiliya ibitubwira, Umusaserdoti ni umukristu utorwa na Yezu, akamutora mu bandi bakristu, kugira ngo amuhe ubutumwa muri Kiliziya ye (reba Heb 5,1). Niyo mpamvu tubasaba ngo murangwe no gukunda abasaserdoti, mubigaragaze mwemera kwakira neza ibyo babatoza : gusenga, gutega amatwi Ijambo ry'Imana, kurangwa n'ibikorwa by'urukundo, guhabwa amasakramentu neza no kwitabira gahunda zose Kiliziya igenera abana. Ibyo bizabafasha gusobanukirwa hakiri kare umuhamagararo wanyu. Bityo bamwe mukazavamo abasaserdoti n'abihayimana beza, abandi bakazavamo abalayiki beza bafasha abasaserdoti kubaka Ingoma y'Imana.

7. **B**ana dukunda, ni byiza ko hari abana bitabira imirimo ya Liturujya bahereza, baririmba mu Kiliziya, basoma Ijambo ry'Imana, bitabira ibikorwa byo gukora isuku mu Kiliziya n'ibindi. Birashimishije cyane uburyo abana

bitabira amatsinda anyuranye bitorezamo kuba abakristu beza: utugoroba tw'abana, imiryango y'Agisiyo Gatorika, amakoraniro y'abasenga, amahuriro y'abana n'ingendo nyobokamana n'ibindi bibafasha kurangwa n' umuco n'uburere bya gikristu . Kwitabira ibyo ni ugufasha Abasaserdoti mu butumwa bwabo.

8. **B**ana bacu, muri uyu mwaka wa Yubile y'Ubusaserdoti turabasaba gusenga cyane musabira abasaserdoti . Bakeneye inkunga yanyu y'isengesho kugira ngo bibafashe kuba Abasaserdoti barangwa no gukunda abantu bose. Mubasabire kurushaho kwitangira abantu nka Yezu. Mubasabire kandi gukomeza gufatanya n'abishimye, abababaye, abakene n'abihebye.
9. **B**ana dukunda, kubera ko umusaserdoti ayobora imihango mitagatifu, turabashishikariza kwifatanya na bo muri iyo mihango mitagatifu: kwitabira Misa, guhabwa Penetensiya, kwitabira inyigisho zibategurira amasakaramentu , gukunda isengesho n'ibindi bikorwa bibatagatifuza muri Kiliziya. Mwirinde gusiba no gukererwa.

Abana bari mu mashuri murangwe no gutanga urugero rwiza mu bandi , mube intangarugero mu kwitabira gahunda zubaka ubukristu: gukunda isomo ry'iyobokamana , gusenga mbere na nyuma y'amasomo, kwitabira amatsinda ya gikristu ndetse n'andi abafasha kuba inkunzi z'amahoro, ubumwe , imbabazi n'ubwiyunge mu bantu.

10. Bana bacu, iyo mukora ubutumwa mu matsinda yanyu, muba mufasha umusaserdoti gukiza roho z'abantu. Mwihatire rero gukora ibikorwa by'urukundo, cyane cyane mu bo mungana bakeneye ubufasha. Haba ku ishuri cyangwa se aho mutuye, muharanire gutanga urugero rwiza, bityo abo muhuye n'abo mubana babigireho imico n'imyitwarire myiza inyura Imana. Mwitoze gukurikiza amategeko y'Imana mwigishijwe kandi muhore mukurikiza ingero nziza muhabwa n'ababakuriye ndetse n'abo mungana. Igihe cyose muzaharanira kwimakaza imigenzo myiza aho muri hose, muzaba mufashije

abasaserdoti kurangiza ubutumwa bwabo. Nimufatanye n'abasaserdoti banyu kugira ngo Ingoma ya Kristu yogere hose (reba Mt 28,16-20).

UMWANZURO

11. Bana dukunda, muri iki gihe twitegura guhimbaza Yubile y'imyaka ijana y'Ubusaserdoti mu Rwanda, ndangije mbasaba kwitabira gahunda zose zateguwe mu maparuwasi yanyu zigamije gufasha abakristu bo mu Rwanda kumva agaciro k'iyi Yubile. Iyi Yubile ibasigire umurage mwiza ukomoka ku mbuto nziza zeze k'Ubusaseridoti ndetse ibasigire n'imbaraga zo gusigasira iyi ngabire maze uko ibihe bisimburana dukomeze kugira abasaseridoti beza banezewa no kwita by'umwihariko ku bana bo Kiliziya ya none n'iyeyeje. Kuri uyu Minsi Mpuzamahanga w'Iyogezabutumwa ry'abana, ndongera kubibutsa ko Kiliziya babarizwamo ari umuryango mugari ukwiriye ku isi yose, ugaterwa imbaraga n'uko abana bayo bunze

ubumwe basangira ibyiza byose bakesha Imana. Ni muri urwo rwego Ibiro bya Papa bishinzwe Iyogezabutumwa ry'Abana bisaba ko uyu muni buri wese: ari umwana, ari umukuru n'undi muntu wese w'umutima mwiza agira icyo yigomwa nk'ituro rigamije gushyigikira Ikigega cya Papa kigamije gufasha abana bo mu bihugu bikennye . Mwibuke ko kimwe mu biranga Yubile ari impuhwe tugirira bagenzi bacu.

Mwese dufatanyije urugendo rwo guhimbaza iyi Yubile y'imyaka ijana y'Ubusaserdoti mu Rwanda, mbifurije Yubile nziza kandi mbaragije Bikira Mariya, Umwamikazi w'Intumwa kandi mbahaye umugisha w'Imana.

Bikorewe i Kigali ku wa 13 Mutarama 2017.

+ Mgr Yohani Damaseni BIMENYIMANA
Umwepisikopi wa Diyosezi Gatorika ya
Cyangugu akaba na Perezida wa Komisiyo
y'Abepisikopi Gatorika bo mu Rwanda
ishinzwe Iyogezabutumwa.

ISENGESHO RYO GUSABIRA ABAPADIRI

Mana ishaka ko abantu bakwemera kugira ngo bakire, turakwinginga; ohereza abapadiri bigishe abantu bawe Inkuru Nziza, babatagatifuze, babayobore mu nzira y'ukwemera. Amahanga yose amenye ko ari Wowe Mana Nyakuri, bamenye n'uwo wohereje, Umwana wawe Yezu Kristu.

Nyagasani, turasabira abapadiri bose ngo bagukunde, bagukundishe abantu, maze nibarangiza kugutunganyiriza muni, bazaze kubana n'intumwa zawe mu ijuru. Kandi natwe uduhe kudahemukira Roho Mutagatifu twahawe muri Batisimu no mu Gukomezwa, dushyire hamwe na bo mu kurangiza ubutumwa washinze Kiliziya yawe. Ku bwa Yezu Kristu Umwami wacu. Amen.